

Atentatua Getxon

ETAK SU-ETENA AZPIEGITURAK, METODOLOGIA ETA MILITANTZIA BERRITZEKO ERABILI ZUELA ADIERAZI DU GETXON

PPren Gobernua «inoiz izan den unerik zailenean» dela dio Mayor Orejak

■ ETaren erasoaldiak Madrilgo Gobernua «inoiz izan den unerik zailenean» izatea eragin duela onartu zuen atzo Mayor Orejak

■ Adierazi zuen Poliziaren «itxurazko eraginkortasun eskasa» ETak azpiegitura eta metodologia berriak dituelako datorrela

■ Espainiako Barne ministroak «adorea» eskatu zion gizarteari, «Poliziaren emaitzak berandu baino lehenago iritsiko direlako»

Agentziak / Getxo

JAIME MAYOR OREJA Espainiako Barne ministroak ETaren erasoaldiak Madrilgo Gobernua une gogorretan egotea eragin duela onartu zuen atzo, Getxora egindako bisitan. Javier Arenas PPko idazkari nagusiarekin eta Carlos Iturgaitz EAEko PPko lehendakariarekin izan zen Getxon Mayor Oreja, herenegun jarritako bonba-autoak eragindako kalteak ikusten eta bizilagunei Gobernuaren «elkartasuna» adierazten.

«Nire ustez, PP Espainiako Gobernura iritsi zenetik inoiz izan den unerik zailenean gaude, inolako dudarik gabe. Izan ere, ETA errukirik gabeko krudeltasunez jokatzeko ari da, eta erakutsi nahi du erakundearen helburua Euskal Herriak bera bezala pentsatzen ez duten guztiak botatzea dela», adierazi zuen. Hala ere, erasoaldi «gogor» horri «adorez» erantzuteko deialdia egin zion gizarteari, eta baita PPko buruzagiei ere. «Inoiz baino gehiago, adorez jokatu behar dugu, horrela eginez gero berandu baino lehenago iritsiko baitira Poliziaren emaitzak. Azkenean ordaindu egin beharko dute herri honi sufriarazitako guztia», gaineratu zuen.

Poliziaren «itxurazko eraginkortasun falta»

Espainiako Segurtasun Indarrek ETaren erasoaldia dela eta duten «itxurazko eraginkortasun falta» ETak azpiegitura berriak dituelako dela esan zuen, halaber, Espainiako Barne ministroak. Hain zuzen ere, Mayor Orejak adierazi zuen egungo egoera «gaizki deitutako su-eten» baten ondorioa dela. «ETak su-etena aprobetxatu du azpiegitura berri bat lortzeko, ziurrenik aurretik zuenaren ezberdina, eta beste prozedu-



Javier Arenas, Jaime Mayor Oreja, Pilar Aresti eta Carlos Iturgaitz, atzo, Arestiren etxeko balkoitik leherketak eragindako kalteak ikusten.

SANTIAGO JIMENEZ / EFE

ra, metodologia eta militante batzuk lortu ditu, eta baita funtzionamendu eskema ezberdina ere», esan zuen Barne ministroak.

Hala ere, ez amore emateko eskatu zuen. «Ezin dezakegu pentsatu berriz izugarrizko indarra eskuratu duen erakunde bat aurrean dugunik», esan zuen, ETaren azpiegitura berrizatuari buruz hitz egin ostean.

ETAK bere ekintzak neurri

JAIME MAYOR OREJA

■ ■ ■ «Ez dugu pentsatu behar gure aurrean berriz izugarrizko indarra eskuratu duen erakunde bat dugunik»

■ ■ ■ «Adorez jokatzeko gero, berandu baino lehen iritsiko dira Poliziaren emaitzak. Herri honi sufriarazi dioten guztia ordaindu egin beharko dute»

handi batean Getxon hasi zituela adierazi zuen Mayor Orejak: «Getxo izan zen ETaren hasiera, eta ni ziur nago hari adorez aurre egitea lortuz gero Getxo izango dela ETaren amaiera ere». Haren arabera, «Getxo ETaren obsesioa da» eta «gorrotoak» itzularazten du bertara.

Azkenik, adierazi zuen PPn badakitela ETaren jomuga direla: «Ez baitugu Lizarrako pasaporte inoiz sinatu».

Lehengo astean lapurtutako autoa

■ HERRIZAINGO SAILLEKO iturrien arabera, herenegun Getxo-ko Neguri auzoan jarritako bonba-autoko Fiat Tipo zuria iragan astean lapurtu zuten. Non lapurtu zuten, baina, ez zuten jakinarazi. Bonba-autoak

marka bereko beste auto baten matrikularekin bat egiten zuen matrikula faltua zuela ere adierazi zuten. Aretxabaletako bizilagun baten Donostiako matrikulako Fiat Tiporen matrikula bera zeraman.

Bestalde, Herrizaingo Sailak oraindik ez du baieztatu ahal izan bonba-autoak zenbat lehergai zuten eta dinamitzat osatua ote zegoen. Javier Balza Herrizaingo sailburuak atzo esan zuenez, baina, litekeena da 40 edo 50

kilo lehergaiz osatuta egotea, kalte materialak oso handiak eta ugariak izan zirelako, eta eztanda duela hila-bete leku berean izandako leherketaren antzekoa izan zelako —ekainaren 25ean Negurin jarritako bon-

bak 50 bat kilo lehergai zituen—.

Azkenik, EAEko Herrizaingo sailburuak adierazi zuen Ertzaintzak uste duela ETak Bizkaian, Gipuzkoan eta Araban azpiegitura «osatu» eta egonkorra duela.